

1 JON

Warage Codoi o Ayɛet Jon

Zooz o Rogeto

1 ¹ Kayeedekuŋ naaga igeet zɔɔz o akati Yesu ween zɔɔz o rogeto baal abil tɔ kanaanta laadun e. Kiziikta naaga nɔɔnɔ, ma kicinta nɔɔnɔ keberene ogaacak ɛɛ. Ma buk kuumta naaga nɔɔnɔ aziine ogaacak. ² Ako zɛɛ mazi ayelzai rogeti nici e, kicinta naaga alya nɔɔnɔ. Kazooza zin naaga gi ci kagaya, ma kaduwakuŋ igeet gi ci akati nɔɔnɔ ween roget o abil been neen baal laadun arome ki Jook ween baatinai, ma iya eyelozeyet ageeta e. ³ Mazin naaga kaduwakuŋ igeet gi ci akati nɔɔnɔ o kicinta ma kiziikta o, ka buk niiga oromtozeyetu ageeta tuwenta ki laŋotizete o kanyaka naaga ŋaaten baatinai kibeen ŋeerin Yesu Kiristo. ⁴ Kayeedekuŋ zin gi nico o, ka talniin onai ageet dook kizi appe.

Jooi niini vooritin

⁵ Inoko zin kaduwakuŋ naaga igeet zɔɔz o kiziikta ŋaati ŋeerin. Kanekuŋ ne, “Jooi niini vooritin, ma akom ŋaatin muur been neen.” ⁶ Mā kazi naaga ne, “Keeginɔ laŋoten kibeen Jook,” maje bar bodo ŋaato kabaak muura, kavɔɔŋ koca naaga zoowowe ci kaduwa o kibeen buk kaale ci kagɔɔn o. ⁷ Bar mazi kabaak naaga vooritina kiyo Jooi o, kizitɔ koca naaga dook laŋoten. Ma oonyanet biyeta o ŋeerin Yesu Kiristo ageet oŋe ogaac dook.

⁸ Mā kazi ne, “Akɔmnet ageet oŋe,” kalaba koca naaga eleeti ogaac maany, ma akɔmnet ageet leeminet. ⁹ Bar mazi kabɔrak naaga Jook oŋe ogaac, aaranet koca niini ageet oŋe ogaac, ma oonyanet ageet kaal o ger kabaca dook lai. Agɔɔn nɔkɔ o, eeci een niini Jook o azooni zoowok o aterket, ma agɔɔn kaal ci abon. ¹⁰ Mā kazi naaga ne, “Ŋaan kutuguz oŋe,” kanyek koca Jook kizi voloŋnyoi, ma alaŋ aavi zɔɔz onine ŋaatina.

Mā Agoonu oŋe

2 ¹ Dɔl ogan tuwenta, kayeedekuŋ igeet kaal nicoko o, ka calaŋ abacanu oŋe. Bar zin mate gɔɔn anyak eet ci abaca oŋec, Yesu Kiristo tɔ. Ŋaan azoozet niini ageet ŋaati baatinai, eeci abon niini ŋaatin ɔɔɔt. ² Mazin Yesu niini alya gɔl o aaryane oŋe ogaac neen. Alaŋ een zin bar oŋe cigaac o doon, bar buk oŋe ci ɔl o loocu dook.

³ Mā kazooni naaga lotinok o Joowo, kagaac koca naaga nɔɔnɔ didi. ⁴ Mā azi ɛeti ne, “Kaga Jook,” ma bar alaŋ azooni lotinok o Joowo, ɛeti nicini voloŋnyoi, ma akom ŋaatin leeminet. ⁵ Maje ɛeti ci azooni zɔɔz onin, eet o didi areez Jook ɔɔɔt neen. Gɔl zin o kaga naaga karomen ki Jook neen ce. ⁶ Mā azi ɛeti ne, “Kaga Jook,” abon abaak niini baayiz ci abon kiyo baale Yesu Kiristo e.

Lotinet o reezonto

⁷ Laŋotigan o kareezuŋ, alaŋ kayeedekuŋ igeet lotinet ci colai, bar kayeedekuŋ lotinet o reen baal iziiktu baale laadun e. ⁸ Kayeedekuŋ zin lotinet nico kizi colak bodo, ma lotinet nico eyelizyai titinyoni onine ŋaati Yesu kibeen ŋaatunooŋ buk, eeci muuri iziitɔ, ma iya vooritin ween didi, ma inoko o atokoli. ⁹ Ma ɛeti ci azi ne, “Kaave naana vooritina,” maje ŋaato amarnin gɔtɔni, ŋaan aavi niini muura nɔkɔ. ¹⁰ Mazin ɛeti ci areez gɔtɔni, aavi niini vooritina. Ma akom gi ci ger agɔɔn niini ka kanyek eet oma kabaca oŋec. ¹¹ Maje ɛeti ci amarnin gɔtɔni, aavi niini muura. Awo niini muura, ma alaŋ aga ŋinti iim o, eeci anyek muuri nɔɔnɔ kizi ruben.

¹² Kayeedekuŋ zin igeet dɔl ogan tuwenta gi nico o, eeci aaryai oŋe ugooc lai zaare o Kiristo. ¹³ Kayeedekuŋ igeet baatigan gi nico o, eeci agayu niiga nɔɔnɔ o aavi tɔ baale kanaanta laadun e. Kayeedekuŋ igeet lɔgɔzet gi nico o, eeci omoktu niiga Loryen.

¹⁴ Kayeedekuŋ igeet dɔl o miliny gi nico o, eeci agayu niiga baatina. Kayeedekuŋ igeet baatizet gi nico o, eeci agayu niiga nɔɔnɔ o aavi tɔ baale kanaanta laadun e. Kayeedekuŋ igeet lɔgɔzet gi nico o, eeci adoknu, ma aave zɔɔz o Joowo ŋaatunooŋ, ma omoktu niiga Loryen. ¹⁵ Mā ŋaan zin areezu niiga looc kibeen kaal ci ger loocu noko, eeci mā areezu looc kibeen kaal ci loocu noko, alaŋ koca areezu niiga baatina. ¹⁶ Kaal zin o looc nico neen reecanzet, ki zinzeeti appinzet, ki eleeti doŋiini. Kaala nicigi alaŋ avu ŋaati baatinai, bar avu niigi dook looce nico. ¹⁷ Mazin lɔɔci nici kibeen kaal ci arɔɔŋ ɔl loota ŋina noko dook katin aŋorneke. Maje bar ɛeti o agɔɔn gi o arɔɔŋ Jooi, arogi niini nɔkɔ been neen.

Miroi o amarnin Kiristo

¹⁸ Dɔl ogan kareezuŋ, izi looc dican aŋon. Iziiktu baale niiga zɔɔz o azi ne, “Aku katin miroiti ci amarnin Kiristo.” Inoko zin eyelizyai ɔl ci meel ci amarnin Kiristo. Kagaac zin naaga izi looc dican aŋon. ¹⁹ Mazin ɔl nici alaŋ da een niigi didi ɔl cigaac. Gi zin ci gɔɔn adeyan niigi ŋaatinai o neen. Mā da waan kiziti niigi ɔl cigaac didi, karome waan ki ageet. Bar zin enyekte niigi ŋaatina o, ka kagaac ɔl dook niigi didi alaŋ een ɔl cigaac.

²⁰ Bar zin niiga anyaku Vɔŋiz o Joowo o akunakuŋ igeet ŋaaten Kiristo. Inoko zin niiga dook agayu gi ween didi. ²¹ Alaŋ zin kayeedekuŋ igeet zɔɔz nico o giye calaŋ agayu gi ween didi. Bar kaga nɔkɔ ŋedet agayu, ma buk agayu niiga akom laadun vɔɔŋ ci orkor ki leeminet.

²² Mazin yo ŋeneen ceen voloŋnyoi o? Eet ceen voloŋnyoi neen ci adanŋye azi ne, “Yesu niini alaŋ een Kiristo.” Ma ɛeti ci azi nɔkɔ o, niini amarnin Kiristo. Ma abor niini baatinai kibeen ŋeerin buk. ²³ Eeci ɛeti ci abor ŋeerti Joowo, abor buk niini Jook. Maje ɛeti ci agama ŋeerti Joowo, agama buk niini Jook.

²⁴ Abon zin azuunu niiga zinzeetine zɔɔz baal aziiknu ɔɔwa e juruŋ. Mā azuunu zɔɔz nice, aromenu koca niiga tup nɔkɔ ki Jook been ŋeerin. ²⁵ Gi zin o aterkedeket Kiristo ageet neen rogeti o abil kodot.

²⁶ Kayeedekuŋ zin gi nico o, ka egenyit ole o arɔɔŋ kalabtawuŋ igeet. ²⁷ Bar zin igeet aavi Vɔŋizi o Joowo tɔ ŋaatunooŋ. Mazi ŋaan aavi Vɔŋizi o Joowo ŋaatunooŋ o, alaŋ arooŋnyu niiga eet ci ka kedemezuŋ, eeci ademezuŋ niini igeet kaal dook. Ma kaal o ademzekuŋ niini igeet aleemnyai, alaŋ een vɔɔŋ. Uzuuti zin demziin ci Vɔŋiz ci Joowo o. Uruktek zɔɔ looc ŋaati Kiristo.

²⁸ Dól ogan kareezuñ, aavtiyek niiga nōōn, ka tiñeere ma aku niini ka calañ kanyak naaga alyaan ñaatin iitene nice. ²⁹ Mā agayu niiga didi Kiristo niini abon, agaac buk ol o agōōn kaal o abon dook niigi dól ci Joowo.

Dól o Joowo

3 ¹ Icinit zin di reezinet o areezet Jooi ageet. Reezinet onine adikir ṛōōt, makacin utuyet ol ageet kiziti dól ci Joowo. Didi zin keegin naaga dól ci Joowo. Gi zin ci gōōn alañ agayet ol o loocu ageet o neen, eeci alañ aga niigi Jook. ² Lañotigan o kareezuñ, inoko naaga keegin dól ci Joowo. Ñaan zin rak inoko kagaac karabōñ tiñeere keel ku, bar zin kaga naaga tiñeere ma aku Kiristo, keel kiyo niini o, eeci katin kacin nōōn kizi didi nōōn ele. ³ Mazin ol dook o are gi nico, abon adewa eleeti kaale o ger ka kobonta niigi kiyo Yesu o.

⁴ Ma eeti ci abaca oñe, abac niini lotinok o Joowo, eeci oñeci baciin ci kabaci lotinok o Joowo. ⁵ Agayu niiga Kiristo aku ka kiiya kaara oñe ola. Maje bar ñaatin ele akom oñec kina. ⁶ Mazin ol dook o aavtiz ñaaten Kiristo, alañ bodo amena ñaati agōōni oñe. Maje eeti ci amenak oñe, ñaan niini kicin Kiristo, ma ñaan buk kagama nōōn.

⁷ Dól ogan tuwenta, má anyeku ol oogi kalabtawuñ igeet. Ma eeti ci agōōn kaal ci abon, niini abon kiyo Kiristo o. ⁸ Maje eeti ci amena agōōn oñe, niini eet ci Loryento, eeci Loryen abaca niini oñe baale laadun kinatamma e. Gi zin baal akuni ñeerti Joowo e neen ka kiiya kōōyok liñliñon o Loryento.

⁹ Ma eeti ci izi dole ci Joowo alañ bodo amena agōōn oñe, eeci anyawun niini ziniz o Joowo. Giye o izoi Jooi baatin, alañ bodo amena niini agōōn oñe. ¹⁰ Ñōōrōōnet zin ci dól o Joowo kibeen dól o Loryento neen ce. Eeti calañ agōōn gi ci abon, karabōñ alañ areez gōōni, alañ een niini dole ci Joowo.

Erēezto niiga dook

¹¹ Eeci azi zōōz baal aziiknu niiga ṛōōwa e ne, Abon kareezō naaga dook. ¹² Alañ abon ñaati keelni naaga kiyo baale eeti o kazi Ken baal aavi libire o Loryento, makacin omony gōōni onin niini maany e. Ma da Ken amony gōōni naa? Amony niini gōōni o, eeci gidañ nōōn ziniz giye baal agōōni niini kaal ci ger, ma abor Jooi dizken onin. Maje waanice gōōnnya agōōn kaal ci abon, ma agama Jooi dizken onin.

¹³ Dól o Yaai tuwenta, má anyeku zin kibiirtuñ ooti mā amarninuñ ol o loocu igeet. ¹⁴ Kaga naaga kudunta daayiza, ma kivitak roget o abil been neen. Kaga naaga gi nico o, eeci kareez dól o yaatigaac tuwenta. Ma eeti calañ areez gōōnōgi, ñaan niini aavi daayiza nōō. ¹⁵ Ma eeti ci amarnin gōōni, niini munyoi ñume o Joowo. Ma agayu niiga eeti ceen munyoi alañ anyak niini roget o abil been neen. ¹⁶ Gól zin o ka kagawi naaga reezinet neen o iya adaayi Kiristo ñaaten ageet. Abon zin buk naaga kadaai ñaaten dól o yaatigaac tuwenta. ¹⁷ Ma anyak eeti kaal ci meelik, ma acin gōōni ci amaati, ma alañ atirit nōōn, azi zin koca ne, Areez niini Jook o, ku? ¹⁸ Dól ogan tuwenta, alañ abon ñaati kaduwan reezinet otoga doon, bar abon kayelza reezinet ween didi kaale ci kagōōn.

Moozet ñume o Joowo

¹⁹ Ma gole nico kagaac koca naaga kiziti ol ci Joowo didi. Ma buk koca kanyak naaga moozet ñume o Joowo. ²⁰ Mayo nuun akat zinzeeti cigaac o vinoc, alañ avir zinzeeti, eeci Jooi aga kaal dook kujuk o kaga naaga zinzeetine ogaac. ²¹ Lañotigan o kareezuñ, mā alañ akat zinzeeti cigaac o vinoc, kanyak zin koca naaga moozet ñume o Joowo. ²² Ma kajowa ñaatin kaal dook o olla kajin naaga nōōn, eeci kazooni naaga lotinok ogin, ma kagōōn gi o atalnin niini. ²³ Mazin gi o aricaneket Jooi ageet neen o abon katuwi naaga zaar o ñeerin Yesu Kiristo, ma abon kareezōne buk naaga aly maany kiyo aricaneket Kiristo niini aly ageet o. ²⁴ Ma eeti ci azooni lotinok o Joowo, oromozek niini Jook, ma aromonek buk Jooi nōōn, ma kaga naaga gi nico Vōñize onin anyet niini ageet.

Demziin ween didi kibeen ween vōñe

4 ¹ Lañotigan o kareezuñ, má olla agamanu zōōz ci ol dook, bar abon gōōn rak niiga añaamneku zōōz ci eeto juruñ, karabōñ zōōz cine o aku Joowa didi. Eeci ol ci meelik uuwak vōñe azaantozek viten nicoko dook. ² Gól zin ci ka ojoktai niiga zōōz o aku Vōñize o Joowo een didi neen ce. Mā azi eeti ne, “Yesu Kiristo iya alye ci eet ci deer,” eeti nici anyak Vōñiz o Joowo. ³ Maje eeti ci adañ zōōz nico, alañ niini anyak Vōñiz o Joowo, bar anyak niini vōñiz ci miroi o amarnin Kiristo baal iziiktu azi zōōz ne ka kiiya e, bar zin buk inoko iya aavuto loota ñino laadun.

⁴ Dól ogan tuwenta, agaac niiga eeginu ol ci Joowo, ma omoktu ol o uuwak vōñe. Eeci Vōñizi o Joowo aavi ñaatonuñ adoi niini ṛōōt kujuk Loryen o aavi ñaaten nōōn ween ol o loocu. ⁵ Azōōz zin niigi kaal o loocu, ma azii ol o loocu nōōn, eeci eegin niigi ol ci loocu ñina. ⁶ Bar zin naaga keegin ol ci Joowo. Ma ol o aga Jook aziñnet niigi ageet. Maje eeti ci alañ een eet ci Joowo, alañ niini aziñnet ageet. Nici zin gól o ka kagayi naaga ñōōrōōnet ci ol o anyak vōñiz o zōōz ween didi been vōñiz o baciinowu neen.

Jooi niini reezinet

⁷ Lañotigan o kareezuñ, kereezto naaga dook, eeci reezinet aku Joowa. Ma eeti ci areez gōōnōgi, niini dole ci Joowo, ma aga niini Jook. ⁸ Maje eeti calañ areez gōōnōgi, alañ aga niini Jook, eeci Jooi niini reezinet. ⁹ Ayeleket zin Jooi ageet reezinet onin gole o itoonane ñeerin o adoi ṛōōr nōōk kiiyak looc ka korogit naaga ñaatin. ¹⁰ Alañ een ageet neen o kareez Jook, bar nōōn neen o areezet ageet, ma itoonaket ñeerin ka kizi gól ci ka kaaryai oñe ogaac. Nici zin reezinet neen.

¹¹ Lañotigan o kareezuñ, mā areezet ageet Jooi o, abon buk naaga kareezō. ¹² Akom laadun eet ci icinun Jook, bar zin mā kareezō naaga, aavi koca niini ñaatinai, ma azaaci reezōnet cinai o kidikir kiyo reezinet onine o.

¹³ Kaga naaga kaavtiz ñaaten Jook, ma aavi buk niini ñaatinai, eeci kanyak naaga Vōñiz onin. ¹⁴ Kicinta zin naaga aly, ma kaduwaka ol kaneka ne, “Itoona Jooi ñeerin ka kiiya kizi rogozoi ci loocu.” ¹⁵ Mā azi eeti ne, “Kaga naana Yesu niini ñeerti Joowo,” aavi koca Jooi ñaatin, ma aavi buk niini ñaaten Jook. ¹⁶ Inoko zin naaga aly kagaac, ma kutuwit reezinet o areezet niini ageet.

Jooi niini reezinet. Mā areez eeti gōōnōgi, aavi niini ñaaten Jook, ma aavi buk Jooi ñaatin. ¹⁷ Inoko zin reezinet o Joowo idikir ñaatinai. Akomnet zin bodo ageet ñoliin tiñeere iitene ci roonnyo e, eeci baayizi cinai kabaayi looce nico o abil kiyo o Kiristo o. ¹⁸ Alañ zin bodo naaga kanyak ñoliin, eeci areezet Jooi ageet ṛōōt, ma reezinet cine o aara ñaatina ñoliin dook, ma atōōk kook many. Ma eeti ci anyak ñoliin, ñaan reezinet o Joowo kidikir ñaatin, eeci ñaan anyak niini ñoliin ci akati payiin ci ger.

¹⁹ Mazin naaga kareez Jook o, eeci Jooi ereezet niini ɔɔwa ageet. ²⁰ Mā azi ɛeti ne, “Kareez Jook,” maje ɲaato amarnin ɔtɔni, niini volonɲoyi. Eeci mā alaɲ areez ɛeti ɔtɔni o acin kebereca, ka zin kereez Jook o ɲaan niini kicin ku? ²¹ Aricaneket Kiristo niini alya ageet gi ci azi ne, “Mā areez ɛeti Jook, abon buk areez niini ɔtɔni.”

Ol o atuwe amok niigi looc

5 ¹ Ma ɛeti ci atu, ma aga Yesu niini Kiristo ween ɲeerti Joowo, niini buk dole ci Joowo. Ma ɛeti ci areez baati doleco, areez buk niini dole o eet nico. ² Zin buk gole nico kaga naaga kareez dɔl o Joowo een ɔtɔnɔga ogaac ɲaati kareezi naaga Jook, ma kazooni lotinok ogin. ³ Eeci ɔl ci kareezi naaga Jook neen ci kazooni lotinok ogin. Ma lotinowa ogine alaɲ adɔi ɲaati kazooni. ⁴ Eeci ɛeti ci izi niini dole ci Joowo anim niini kɔmɔk gerzitin o loocu. Kanim zin naaga komogit looc tuwente onai. ⁵ ɲeneen zin inoko ci anim kɔmɔk gerzitin o loocu? Eet ci anim kɔmɔk gerzitin o loocu dook neen ci atu, ma aga Yesu niini ɲeerti Joowo.

Bacok o Yesu Kiristo een iiyu

⁶ Ma Yesu Kiristo niini ɲeerti Joowo didi. Ayelzai gi nici tonyente o maamu kibeen biyete o daayiz onin. Alaɲ ayelzai niini tonyenta doon, bar ayelzai niini tonyenta been biyete. Vɔɲiz zin o Joowo neen ween bacoi onin. Niini Vɔɲiz o aduwa zɔɔz ween didi. ⁷ Anyak zin bacok ceen iiyu, Vɔɲiz o Joowo kibeen maam been biye. ⁸ Nɔɔɔ dook iiyontiya adoye zɔɔz cineej. ⁹ Mā kagama ɔɔɔn naaga zɔɔz ci aduwa ɛeti ci deer, abon zin bar kaga naaga zɔɔz ci aduwa Jooi o adɔi ɔɔɔt kujuk zɔɔz ci aduwa ɛeti ci deer. Nici zin zɔɔz o aduwa Jooi zooze o akati ɲeerin neen. ¹⁰ Mazin ɛeti ci atu ɲeerti Joowo anyak niini zɔɔz nico zinize onin. Maje ɛeti calaɲ atu Jook, anyek niini Jook kizi volonɲoyi zooze nico, eeci alaɲ atu niini zɔɔz o aduwa Jooi ɲaaten ɲeerin. ¹¹ Azi zin zɔɔz ci aduyai ne, “Anyet Jooi ageet roget o abil been neen, ma rogeti nici ajoyai ɲaati ɲeerin. ¹² Ma ɛeti ci atu ɲeerti Joowo, anyak niini roget nico. Maje ɛeti calaɲ atu ɲeerti Joowo, alaɲ niini anyak roget nico.”

Roget o abil been neen

¹³ Kayeedekuɲ naana igeet o atuyu zaar o ɲeerti Joowo zɔɔz nico o, ka agaac niiga anyaku roget o abil been neen. ¹⁴ Kanim naaga kijinit Jook labak o, eeci kaga naaga mā kajin nɔɔnɔ kaal o karɔɲ ɲaatin gole o arɔɲ niini, aziiknet niini ageet. ¹⁵ Aziiknet ɔɔɔn niini ageet mā kajin naaga nɔɔnɔ. Mazi kaga naaga zɔɔz nicini een didi, kaga zin buk naaga anyet niini ageet kaal o kajin nɔɔnɔ dook.

¹⁶ Ma acin ɛeti ɔtɔni ci agɔɔn oɲec calaɲ akɔyi nɔɔnɔ daayiza, abon ajinek niini nɔɔnɔ Jook, ka korogoz Jooi nɔɔnɔ. Ma zɔɔz nici akati ɔl o oɲe ugeec alaɲ avɔyi nɔɔnɔ daayiza. Anyak zin oɲe ci avɔyi ɔl daayiza. Mazin eet ci agɔɔn oɲec nico o, alaɲ naana kazi ne, Ijintek nɔɔnɔ Jook. ¹⁷ ɲedet kaala o gerze kagɔɔn dook oɲe gi, bar zin anyak oɲec calaɲ akɔyi eet daayiz.

¹⁸ Kaga naaga akom dole ci Joowo ci amena agɔɔn oɲe, eeci ɲeerti Joowo azooni nɔɔnɔ calaɲ Loryen agoonek nɔɔnɔ gi ci ger.

¹⁹ Kaga naaga keegin ɔl ci Joowo nɔkɔ, mayo nuun abal looc nico dook Loryen o.

²⁰ Kaga naaga ɲeerti Joowo iya, ma iya anyet niini ageet genyiz ci kagawi Jook ween didi, ma karome naaga ki Jook ween didi kibeen ɲeerin Yesu Kiristo. Nicini zin Jook ween didi neen, ma ɔl o atu nɔɔnɔ anyak roget o abil been neen.

²¹ Dɔl ogan tuwenta, edeya eleeti ugooc joowanene o adilyai.